

- 1<sup>r</sup> Wer durch keyn ander vrsach me
- 2<sup>r</sup> Dann durch güts willen grifft zûr ee
- 3<sup>r</sup> Der hat vil zancks / leyd / hader / we /



## wiben durch gutz willen

- 1 Wer schlüfft jnn esel / vmb das schmâr
- 2 Der ist vernunfft / vnd wißheyt lâr
- 3 Das er eyn alt wib nymbt zûr ee
- 4 Eyn gûten tag / vnd keynen me

5 Er hat ouch wenig freüd dar von  
 6 Keyn frucht mag jm dar vß entston  
 7 Vnd hat ouch nyemer gûten tagk  
 8 Dann so er sicht den pfenning sagk  
 9 Der gatt jm ouch dick vmb die oren  
 10 Durch den er worden ist zûm doren  
 11 Dar vß entspringt ouch offft vnd dick  
 12 Das dar zû schlecht gar wenig glück  
 13 So man das gût alleyn betracht  
 14 Vff ere / vnd frümkeyt / gar nit acht  
 15 So hatt man sich dann vber wibt  
 16 Keyn fryd noch fruntschafft me do blibt  
 17 Lichter were jm syn / jnn der wüst  
 18 Dann das er lang zyt wonen müst  
 19 By eym zorn / wâhen / bösen wib  
 20 Dann sie dôrtt bald des mannes lib /  
 21 Worlich zû truwen ist dem nüt  
 22 Welcher vmb gelt syn jugent gytt  
 23 Sidt das jm schmeckt des schmâres rouch  
 24 Er dôrst den esel schynden ouch  
 25 Vnd wann es langzyt vmhar gat  
 26 So fyndt er nüt dann myst vnd kat  
 27 Vil stellent Achabs dochter noch  
 28 Vnd fallent jnn syn sünd vnd roch /  
 29 Der tûfel Asmodeus hat  
 30 Vil gwalt yetz jnn dem eelichen stat /  
 31 Es sint gar wenig Boos me  
 32 Die Ruth begeren zû der ee  
 33 Des fyndt man nüt dann ach vnd we  
 34 Vnd criminator te / kratznor a te